

**Tiroma Leta
Paul Mo Ulia Isan
Timothy
Leta Nike**

Timothy mo lo usuri Paul na nona voko (Rom 16.21; 1Co 16.10; Php 2.19) mata nora rasua hin Iesu. Paul mo hitea sohena natuna matea (1.2). Timothy mo mai patu tamlohi na nona rani peresi Paul, enia tapalan Paul. Paul mo sohai leta sei isan Timothy, pani vujangi hinia mo tueni na mauri vao kalesia non God. Mo vujangi na malele tataholo vara řa viřoni na patu tamlohi hinia, deacon la vai na vavahinau non God (3.1–7; 8–13; 5.17–20).

Reti non Paul akerihi řa eři rasua tarea:

‘Reti nike, o eři rasua ale mo tataholo vara o lavi vevuhia, vara, ‘Křisto Iesu mo mai na varama vara i juri na tamlohi hehe.’ Enau na sasati jea hinira. Pani God mo řomopoiu matan hinia sei, matan enau na sasati jea hinira, ale Iesu Křisto mo tauau vara a mai tovongi matea vara i vujangi na nona řomperavu isan la haratu la pa rasua mata mauri tui.’ (1.15–16)

Hin Leta Nike

1. Retioloolo (1.1–2)
2. Retivujangi mata mauri kalesia (1.3–3.13)
3. Hina aulu na nořa lotu (3.14–4.5)
4. Paul mo retituetueni Timothy (4.6–6.21)

Reti Tiroma

¹ Enau Paul, vahařule matea non Křisto Iesu God mo viřoniau na nona suiha, Křisto Iesu nořa Jujuri enia nořa řomtoho. ² Timothy, natuku hin nořa mauri rasua, na lo usiusi matam vara God Tamařa enia Křisto Iesu nořa Moli, la sileho na řomřuhu, na řomopoi peresi na tamata.

Retiřoařohai Mata Vujangi Haluhalu

³ Sohen na vereā řilangi isam hin rani atu na tauho Ephesus vara a vano Macedonia, na vereā vara o pa toho vara o sile na reti isan la tamlohi atu vara la sopo vujangi te vujangi tinapua, ⁴ teni vara la sopo usuri te sorasora halu teni te sorasora vono mata sava pina tuai la tataholo hinira, vuana enia řomřomi vono purongo, la hinau sei la sopo tueni te tamlohi na mauri mata rasua hin God. ⁵ Pani nořa řomřomi tavera hinia, enia opoia, opoia mo tai isana mapu vokevoke peresi na rongvosahi na hinau tataholo, peresi na rasua varařuhu. ⁶ Tamlohi hai, la jalio, la posi la usuri na sorasora vono, ⁷ la opoia vara la mai tamlohi vujangi mata leu, pani la sopo levosahi na sava la lo vereā teni na hinau sei la vereā vara la levosahira mo řuhu vara la tataholo teni mo vono.

⁸ Ale řa levosahia vara Leu mo řuhu, pani vara tea mo lavia na posposi tataholo purongo, ⁹ ha levosahi harihi: God mo sopo sile na leu mata tamlohi tataholo, pani isan la haratu la lo vaivaileu, la haratu la sopo oloolo hin te tamlohi hatea, la haratu la lo usuri na posposi varama, la haratu la lo hehe, la haratu la sopo sile na oloolo isan te hinau mata oloolo, la haratu la lo vilimatei na tamara teni tinara, la haratu la lo vilimatei na tamlohi tinapua, ¹⁰ ale la haratu la lo vai na posposi lumihā, tamlohi la vaivaileu peresi na tamlohi, hařai la vaivaileu peresi na hařai, la haratu la lo tauri vanaho na tamlohi mata la hařehira, ale la haratu la lo retihalu tarea, la haratu la lo taviti halu na lolo court, ale na posposi lejileji tari sei la lo turuleji na vujangi řuhu sei, ¹¹ mo lo usuri na Retiřuhu řuhuřuhu non God sei enia avulahi tavera, ale Retiřuhu sei mo taua isaku.

¹² Na vere meje isan Křisto Iesu nořa Moli, mo sile na řilařilangi isaku, matan mo hitea sohena vara a eři vai na masalona, ale mo viřoniau vara a volitusi isana, ¹³ hina purongo vara tiroma na lo verelejleji Křisto, na lo unuhi

na nona tamlohi vara a komora, ale na kerekerera, pani God mo řomopoiâu mata na sopo lo levosahi na sava na lo vaia matan na sopo rasua, ¹⁴ Ale řomřuhu non nořa Moli mo mařivi savulevule matakú na rasua peresi na opoia hin Křisto Iesu. ¹⁵ Reti nike, o eři rasua mo tataholo vara o lavi vevuhia vara: Křisto Iesu mo mai na varama vara i juri na tamlohi hehe. Enau na sasati jea hinira. ¹⁶ Pani God mo řomopoiâu matan hinâu sei, matan enau na sasati jea hinira, ale Iesu Křisto mo tauau vara a mai tovongi matea vara i vujangi na nona řomperavu isan la haratu la pa rasua mata mauri tui. ¹⁷ Nake, isan Supe mata tauni tari, i sopo eři tihai, tea i sopo eři hitea, enia God matelete, řa pa silea na olooło tavera peresi na hasohaso na rani tui tui tarea. Amen.

Vavahinâu Non Timothy

¹⁸ Timothy natuku, reti nike na lo vereá isam, mo lo usuri na retimangovi sei la vereá matam moiso, la pa tueniho vara o eři vai na vuro řuhu, ¹⁹ tarea o tauri řilangi na nom rasua peresi na nom rongovosahi na hinâu mo tataholo, ale tamlohi hai la tau nařihira, la komo na nora rasua sohena boti mo vujahi kosahia na paranga. ²⁰ Tatuara sei, Hymenaeus enia Alexander, enau na taura la vano na liman Setan vara i pa vujangira vara la pa sopo mele turuleji hin God na nora vujangi haluhalu.

2

Vujangi Mata Lotu

¹ Tiroma, na lo vereá řilangi vara tamlohi na nora usiúi mata tamlohi tari, la usi God mata tuetueni, la usiúi mata tinapua, ale vara la vere meje isan God. ² Mata supe peresi la haratu sei la lo tauri na suiha, matan vara řa pa eři mauri na mauri mo tamata, ale mo malum vara řa eři usuri na mauri tataholo, ale řa sile na olooło isan God. ³ Usiúi sohena, mo řuhu na nahon God, nořa Jujuri, ale

mo avulahi hinia, ⁴ matan God mo opoia vara i juri na tamlohi tari, ale vara la pa levosahi na retivarařuhu.

⁵ Matan God enia matelete purongo, ale tamlohi tuetueni matelete purongo sei enia mo malele tamlohi la mai isan God, tamlohi atu enia Křisto Iesu, ⁶ mo hase silea sohena volituhu mata tamlohi tari, reti sei enia vereulia sei God mo silea na rani tataholo.

⁷ Matana, God mo viřoniau vara a mai vahařule matea, ale vara a mai tamlohi retivujavujangi matea, na lo vere na varařuhu na sopo halu, God mo řuleau vara a vujangi na tamlohi řořoha na malele rasua peresi na retivarařuhu.

Posposi Mata Hařai

⁸ Moiso, na opoia vara tamlohi na jara tari la usiisi, ale la tahe na limara tapu isan God, i pa sopo te lolokoru teni vasvas hinira. ⁹ Sohena, na opoia vara tarea hařai la ruru na ruru na řomřomi řuhu i tataholo na naho tamlohi. Mo řuhu vara la sopo peri na vulura na malele tinatinapua peresi na hinau mata gold teni huřutavila teni ruru volina mo sahe aulu jea, ¹⁰ pani hin haratu purongo, mo tataholo mata hařai sei mo lo vereva vara enia mo lo usuri posposi atu God mo opoia, peresi na vavahinau řuhu. ¹¹ Hařai la pa toho malum la tapurongo, ale la tatamahu vara la oloolo matan vara la eři lelevosahi. ¹² Tarea, enau na sopo majinga vara hařai la vujangi teni la mai patu tamlohi la tiroma la aulu na tamlohi. Mo vono, enira la pa toho malum purongo, ¹³ matan God mo vai Adam tiroma moiso mo pa vai Eve. *Gen 2.7, 21-22*

¹⁴ Ale Tiapolo mo sopo halu Adam, mo halu na hařai, ale mo tope na retileu non God. *Gen 3.1-6*

¹⁵ Pani God i pa juri na hařai na tapetape, vara la lo turu řilangi na rasua, opoia, la hahau na mauri vokevoke peresi na posposi hasera taurilatira.

3

Patu Tamlohi Na Vao Kalesia

¹ Reti nike o eři rasua, vara tea mo tau na řomina vara i pa patu tamlohi rasua matea mata tamlohi rasua, mo opoi na vavahinau řuhu matea.* ² Ale matana, o kilau vara mo sopo te hinau na maurina, mo lahi na hařai matelete, mo hase taurilatia, enia tamlohi řomřomi, o hitea vara tamlohi la lo sile na oloolo isana moiso, enia mo avulahi vara i lavi na tamlohi tinapua na imana, ale enia mo levosahi na posposi mata vujangi mo řuhu, ³ Ale, enia mo sopo tamlohi inu hajavua, mo sopo tamlohi valum, pani řomina mo malum, mo sopo tamlohi vasvas, ale mo sopo tamlohi řomjea na mania, ⁴ ale mo lo kilau mamahuni na lolo imana, ale natuna la sile na oloolo isana, ale la oloolo hinia. ⁵ Matan vara tea mo sopo eři kilau mamahuni na imana, i pa kilau mamahuni na vao kalesia non God sohena sava? ⁶ Enia i pa sopo tamlohi matea mo pa mai purongo na mauri kalesia, matan patuna i pa sosohi na mangisi tavera, ale i jovi sivo na talai non Tiapolo. ⁷ Moiso aulu hin haratu, tamlohi na jingoima la vereva vara maurina mo tataholo, ale matan i sopo eři jovi hin te vuna non Tiapolo, ale i mahanuhanu matana.

Malele Viřoni Na Deacon

⁸ Deacon sohena, o hitea vara tamlohi la lo sile na oloolo isara moiso, ale enira la sopo meme masanga, la sopo tamlohi inu hajavua, la sopo řomtutuni na mania. ⁹ Ale la tauri řilangi na hinau luhu mata rasua na posposi sei tarea řomira la tataholo na nahon God. ¹⁰ Ale o vaihitera tiroma vara ko sopo hite te hinau na maurira, ale o pa majinga hinira vara la volitusi sohena deacon.

Hařai Deacon

* **3:1:** patu tamlohi rasua: řaramin reti sei, patu tamlohi enia tamlohi atu mo lo kilau na tamlohi rasua na jara matea.

¹¹ Haʻāi sohena, vara la deacon, o hitea vara tamlohi la lo sile na oloolo isara moiso, la sopo sorasora tamlohi, la lo hase taurilatira, tarea la lo usuri na masalon God na hinau tari la lo vaira.†

¹² Deacon la lahi na haʻāi matelete, la lo kilau mamahuni na natura peresi na imara.‡ ¹³ Matan la haratu la lo volitusi ʻŕuhu sohena deacon la pa lavi na hija ʻŕuhu nora, ale la pa lavi na ʻŕomʻilangi na nora rasua hin Kʻristo Iesu.

Posposi Tataholo Na Vao Kalesia

¹⁴ La hinau sei na lo ulia isam, na lo ʻŕomtoho vara a pa vano isam vila, ¹⁵ pani vara te hinau mo tauriau, leta nike i pa tueniho vara o levosahi na posposi mo tataholo na vaon God. Vaona enia vao kalesia non God mauri, vao kalesia enia peri, ale enia lapiti retivaraʻuhu. ¹⁶ Hina tavera matea kama taviti hinia, pulo noʻa rasua enia hina luhu matea:

Kʻristo, mo pala mo mai tamlohi,

Tanume Tapu mo vujangia vara enia natu Kʻristo,
angelo la hitea,

ale tamlohi la vereulia na mara jara tinatinapua tari,
moiso tamlohi na varama la rasua,
ale God mo lavia mo sahe aulu na hasohaso na tuka.’

4

Vujangi Nona Tanume Sasati

¹ Pani, Tanumen God mo vere mamahunia vara na pongi hitahu tamlohi hai la pa vahaʻi na malele rasua matan la pa tapurongo isana tanume haluhalu peresi na vujangi non tanume sasati, ² ale retihaluhalu sei la pa tai isana tamlohi tapnetano, ʻŕomira la sulimateira, ale la

† 3:11: haʻāi: hai la verea vara haʻāi mo opoia vara i mai deacon, teni narou deacon. ‡ 3:12: haʻāi matea: mo sopo tipahi na narouna hin te rani.

sopo mele levosahia vara sava mo tataholo, ³ ale enira la tapuhoro na lahi, moiso la horo na tatua hanhani sei God mo vaira matan vara la haratu la rasua la levosahi na retivarañuhu la pa lavira na vere meje, ⁴ matan hinau tari God mo vaira la řuhu, ale mo sopo te hinau vara tamlohi la řohu hinia vara la lavia la vere meje matana moiso, ⁵ matan reti non God peresi na ususi mo lo vai na hanhani la řuhu na nahon God.

Paul Mo Retituetueni Timothy

⁶ Vara o vujangi la hinau sei isana vorai peresi na vevorai, o pa volitusi řuhu non Křisto Iesu, matan ko hase vahaniho na Retiřuhu peresi na vujangi řuhu sei ko lo usuria. ⁷ Pani o toho asau na sorasora vono la rongorongo vono, ale o hase vujangiho na posposi sei God mo opoia, ⁸ matan řa levosahia vara, vara ko vai na epem mo řilangi, haratu mo řuhu makomona purongo, pani vara tarea o lo usuri na posposi God mo opoia, i pa řuhu jea na maurim tari, mo řuhu mata maurin nake peresi na mauri atu i pa mai hitahu. ⁹ Reti nike o eři rasua, ale mo tataholo vara tamlohi la pa usuri vevuhia. ¹⁰ Matan harihi, řa lo tau na řomiřa mo řilangi na vavahinau matana, řa řomtoho hin God sei mo mauri, enia Jujuri nona tamlohi tari, pani isan la haratu la rasua enia mo Jujuri varařuhu.*

¹¹ O retileu, ale vujangi na hinau nike. ¹² O sopo tinařihia vara tamlohi la hitesatihio matan ko uluvou purongo, pani tarea o vai na tovongi řuhu isana tamlohi rasua na nom retireti, na nom vavahinau, na nom opoia, na nom rasua peresi na nom posposi vokevoke. ¹³ Ale i pa tikeli na rani a mai isam, o lo tau na řomim vara tarea

* **4:10:** reti sei: God enia Jujuri nona tamlohi tari mata enia hasena i pa eři juri na tamlohi, pani i pa sopo tamlohi tari la pa mauri matan la pa sopo rasua, pani isan la haratu la rasu God nora Jujuri, enira la pa mauri.

o lo evievi na Retitapu na naho tamlohi rasua, o lo vere mamahunira na malele tari mata mauri rasua, ale o lo vujangi na retivaraŕuhu. ¹⁴ O sopo ŕompurongo hin nom silesilea atu God mo silea isam na retimangovi atu hin rani atu la patu tamlohi rasua na vao kalesia la usiisi la tau na limara na patum.† ¹⁵ Tarea o lo hahau usuri la vujangi atu, o tau vevuhi na ŕomim hinira matan vara tamlohi la pa hitea vara ko lo ulua na mauri rasua. ¹⁶ O hase kilauho, o kilau mamahuni sava ko lo vujangia. O turu ŕilangi hin la hinau sei matan vara o vaia o pa eŕi juriho peresi la haratu la lo tapurongo isam.

5

Vavahinau Nona Patu Tamlohi Rasua

¹ O sopo hapuhi na tamlohi taunina mo jeu na taunim, pani o usia i ŕilangi isana sohen ko lo vaia isan tamam, ale o retireti isan la haratu taunira mo sopo lo jeu na taunim sohena tasim. ² Isana haŕai taunira la jeu na taunim, o retireti isara sohen ko lo retireti i ŕuhu isan tinam, ale o retireti i ŕuhu isana haŕai taunira la sopo jeu na taunim sohena vetasim, ale o sopo sile na masapa isam hasem mata o ŕomlumiha hinira.

Ha Lo Kilau Na Haŕai Malepu

³ O sile na oloolo isana haŕai malepu la haratu la haŕai malepu varaŕuhu, harasei mo sopo te tinapua vara la pa lo kilaura. ⁴ Pani vara te haŕai malepu te natura teni nona vajiaha mo lo toho, mo ŕuhu vara enira la vujangi na nora rasu na vavahinau mata la kilaua sohen haŕai atu mo lo tapna kilaura tiroma, matan God mo avulahi hin posposi sei. ⁵ Haŕai malepu varaŕuhu mo sohen harihi, mo lo toho hasena, ale enia matea mo tau na ŕomina isan God tarea,

† **4:14:** patu tamlohi rasua: la posia mo tinapua sohen harihi: patu tamlohi, elda teni bishop. O hite: 5.17, 19

ale posina enia mata usiusi mata tuetueni na rani teni na vutepongi, ⁶ pani vara te hañai malepu mo lo řomřomia enia hasena, mo lo mauri, pani mo mate moiso. ⁷ O retileu hin la hinau nike isara matan i pa sopo te masapa vara tamlohi la pa pisuhira. ⁸ Pani vara tea mo sopo kilau na tahisana, ale aulu hin haratu, mo sopo kilau la haratu na lolo imana, mo vahañi na posposi rasua, posina sei mo sati mo jeu la haratu la sopo rasu God.

⁹ O tau na hija hañai matea na pepa sei mo verea vara sava hañai malepu natu, vao kalesia i pa tuenira, hijan haratu purongo mo lahi vahatelete, ale taunina mo jeu mo ngavulu limarave. ¹⁰ Hañai atu tamlohi la lo verea tarea vara enia hañai matea mo lo vai na vavahinau řuhu, ale vara te natuna, mo kilau mamahunira la mai la tavera, ale tarea mo avulahi vara i lo lavi na vinano la mai na imana, ale posina mo lo sile na ololo isana tapuhi tinatinapua non God, mo avulahi vara i hoje na palora, ale mo tau na řomina vara i vai na vavahinau řuhu tari.* ¹¹ O sopo uli na hija hañai malepu la sopo vajiaha matan masalora mata lahi mo jeu na řomira vara la usuri Křisto, ale la pa rovo hinia matana. ¹² Matana, talai i pa mai isara matan la tope na nora retitauhi isan Křisto vara la pa sopo mele lahi. ¹³ Mo sopo haratu purongo, pani la hañai maloko vari purongo, la lo hahau řalihi na jara la vavano na ima tinatinapua matan vara la aleale retireti. Enira la sopo vai na posposi mata maloko vari purongo, la lo sorasora tamlohi, ale la lo tau na ngalsura hin te hinau mo sopo te nora hinau hinia, ale la lo verea te hinau la sopo tataholo vara la verera. ¹⁴ Ale na lo verea vara i pa mele řuhu jea vara hañai malepu la sopo vajiaha la mele lahi, la mele

* **5:10:** Leon Greek mo verea sohen harihi: vara mo hoje na palo tamlohi viřoni. Mo verea matan tuai la lo tau nora Sabbath na jingoima, ale posposi tataholo enia vara engko teni nom volitusi i pa hoje na palora.

vasusu moiso, la kilau mamahuni na imara, ale la sopo sile na masapa isan noŕa meresahi teni te masapa vara tea i retiŕeŕen hiniŕa matara. ¹⁵ Matan hai la vano la posi moiso, la usuri Setan. ¹⁶ Pani vara te haŕai rasua te haŕai malepu la lo toho na vaona, i pa lo kilau mamahunira vara la sopo tau na tetehi isana vao kalesia atu, matan vao kalesia la pa lo kilau la haratu la haŕai malepu varaŕuhu.

Volin Patu Tamlohi Rasu

¹⁷ Na tavaluna, patu tamlohi rasua la ŕuhu mata tiroma na vao kalesia, mo tataholo vara ha volira i vaha rua, sohen la haratu la lo voko ŕilangi na nora retivujavujangi peresi na vujangi. ¹⁸ Matan, Retitapu mo verea vara, ‘Na rani buluk mo lo savahi na patu wit, ha sopo lasi na jingona vara i sopo eŕi hani te wit makomo atu’. *Deut 25.4* Ale mo mele verea vara ‘Mo tataholo vara tamlohi voko i lavi na volina’. *Lk 10.7* ¹⁹ Ale, o sopo tapurongo tiroma isan tea vara mo tuvai na patu tamlohi rasua matea, pani vara tamlohi mo rua teni mo tolu, la levosahia mo ŕuhu vara tuvai atu mo tataholo, ale nake o eŕi tapurongo hinira. ²⁰ Vara te patu tamlohi rasua hatea mo lo usuri na nona hehe, o hapuhia na naho tamlohi rasua tari matan vara enira mo isoiso la pa matahu matana. ²¹ Na nahon God peresi na nahon Kŕisto Iesu peresi na angelo God mo viŕonira, na lo sile na retileu isam vara o taurilati la retileu tari sei na lo verea isam vara o sopo opoi na tatuara purongo, ale o sopo vai te hinau na posposi tametame! ²² Ale o sopo vilavila vara o tau na limam hin te tamlohi matan vara o tahea vara i vai na vavahinau non Moli, o pa levosahi mamahuni na posina tako, vara i vono engko o pa hase komoho na nona hehe. O lo toho na mauri vokevoke. ²³ Ale o sopo inu na wai purongo, pani o lo inu na waen makomona matan pangem peresi na nom rojoa sei la lo toho isam. ²⁴ Hehe nona tamlohi hai la malue na jara tavera la tiromara na

rani mata aria, pani te hehe nona tamlohi tinapua, la pa pala hitahu. ²⁵ Mo sohen haratu isana vavahinau ŝuhu nona tamlohi, la memera purongo, pani vara la sopo pala tako, pani la pa pala hitahu.

6

Vavahinau Nona Slev

¹ Haratu la rasua, pani la lo slev, mo tataholo vara la sile na ooloo isana nora tamlohi tatavera tarea matan vara tea i sopo eŝi retisatihi na hijan God teni na vujangi ŝuhu.

² Vara slev te nora tamlohi tatavera la vorai rasua, la pa sile na ooloo isara, matan enira la vorai rasua sohera, mo ŝuhu vara la vai na vavahinau ŝuhu isara, i jeu na tamlohi tatavera tinapua matan, enira la vorai rasua, ale God mo opoira.

Reti Haluhalu Peresi Na Tavtav Varaŝuhu

Timothy o vujangi la hinau sei isana tamlohi, o vere a ŝilangi vara la pa ooloo hinira. ³ Vara tea mo lo vujangi te vujangi tinapua, ale mo sopo majinga na reti tataholo non noŝa Moli Iesu Kŝisto, peresi na vujangi sei mo lo usuri na mauri God mo opoia, ⁴ tamlohi sohena, mo mangisi jea, mo sopo levosahi te hinau hatea. Mo opoia hajavua vara i lo sorasora hin te hinau tamlohi la sopo levosahia vara mo varaŝuhu teni mo vono, ale mo lo retireti na hinau matuvana mata vasi purongo. Posposi atu mo lo vaia mo vai na tamlohi la lo mereimerei, la patumasa, la retiŝeŝen, la ŝomŝomi sati hinira, ⁵ ale tarea la vasvas peresi haratu ŝomira la lejileji, mo sopo te retivaraŝuhu hinira, ale la ŝomŝomia vara posposi mata mauri rasua mo sile na masapa isara vara la tavgav, ⁶ varaŝuhu, posposi mata mauri rasua i pa vai na maurim i tavgav, pani isan la haratu purongo sei tarea la sopo ŝomusuri te hinau tinatinapua, ⁷ matan ŝa vora lekoleko na varama, ale vara ŝa mate, ŝa pa malue lekoleko. ⁸ Pani vara te haŝa hanhani teni te

noña ruru, řa pa avulahi matara, ⁹ pani la haratu la opoia vara la tavgav, la pa jovi na hina vaihite, ale masalora mo lihora na hinau rongorongono vono peresi na hinau mata komora purongo, ale hinau sei mo putehi na tamlohi na komokomo tavera. ¹⁰ Matan, opoia mata mania enia pulo hinau mata hina sasati tari. Matan masalo sohena, mo reve nařihi na tamlohi hai na malele rasua moiso, ale la hase sarihira hin te rongosati matuvana.

Isoiso Reti Non Paul Isan Timothy

¹¹ Pani isam, tamlohi non God, o rovo hin la hinau sei. O tutungui na malele mata mauri tataholo, o tutungui na posposi atu God mo opoia, rasua, opoia, řomperavu peresi na řommalum. ¹² O vai na valum řuhu mata rasua, o taurilati mauri tui atu God mo toviho hinia, peresi taviti řuhu atu ko vaia na naho tamlohi matuvana. ¹³ Na lo vereaa na nahon God sei mo lo sile na mauri isana hinau tari la mauri, peresi nahon Křisto Iesu sei mo vere na taviti řuhu mata retivarařuhu na nahon Pontius Pilate, ale na lo vereaa vara ¹⁴ engko o pa taurilati retileu nike, o sopo malue nařihi hinia i tikeli rani atu Iesu Křisto noña Moli i mele pala:

¹⁵ na nona rani tataholo,
 enia haratu mo avulahi mo tavera jea,
 ale enia hasena mo aulu na hinau tari,
 enia Supe nona supe,
 enia Moli nona moli.

¹⁶ Enia hasena, mo lo toho jejeu,
 mo lo toho hin memera tavera atu
 tamlohi la sopo eři mai mariviti hinia,
 mo sopo lo tea i hitea,
 teni tea i eři hitea.
 Isana, řa pa sile na ololo,
 ale enia i pa lo tauri na suiha tui tui tarea. Amen.

Haratu La Tavgav

¹⁷ Isan la haratu la tavgav nake na varama, o vereia isara vara la sopo tau na řomira i sahe aulu teni vara la řomtoto na nora tavgav, matan řa sopo levosahia vara la pa toho i tikeli pangisa. Pani o vereia isara vara la lo řomtoto hin God hasena, matan enia mo lo sile na hinau tari isařa matan vara řa avulahi hinira. ¹⁸ O vereia isara vara la lo vai na hinau la řuhu, o vereia isara vara la tavgav na nora vavahinau řuhu, la pa hansohai, ale na nora řomavulahi la tatamahu vara la asease na nora hinau. ¹⁹ Hin malele sei, la lo takonahi na tavgav tavera matara hasera, sohena pulo řuhu matea matan mauri atu mo lo mai, ale o vereia isara matan vara la eři taurilati mauri atu, enia mauri vara řuhu.

Isoiso Reti Non Paul

²⁰ Timothy o matahi la hinau sei God mo lo silea isam moiso. O sopo usuri na sorasora vono teni te řomřomi sei la vereia vara enia 'hina lelevosahi' ²¹ matan tamlohi hai la lo turu hinia la lo vano malue na malele rasua moiso.

Noku usiisi vara řomřuhu non God i pa toho isamim isoiso.

Tangoa New Testament
The New Testament in the Tangoa Language of Vanuatu
Le Nouveau Testament dans la langue Tangoa de Vanuatu

copyright © 2010 Wycliffe Bible Translators, Inc.

Language: Tangoa

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-11-24

PDF generated using Haiola and XeLaTeX on 11 Sep 2021 from source files dated 10 Sep 2021

89356e5c-df58-558e-9b27-ae0321adb2df